



Rau hnuv tim 31 lub lb Hlis xyoo 2025, U.S. Immigration and Customs Enforcement (ICE) tau tshaj tawm ib tsab ntawv ceeb toom hais tias qee qhov chaw uas yav dhau los tsis pub ICE mus ntes neeg, xws li cov tsev teev ntuj, kev sib koom ua pawg taug kev tawm tsam thiab txhawb siab, tam sim no tsis muaj kev tiv thaiv tsis pub ntes neeg lawm. Ntau lub koom haum txhawj xeeb txog qhov kev tshaj tawm no thiab tsis paub tseeb tias lawv cov cai muaj li cas thiab lub luag hauj lwm yog yuav tsum ua dab tsi yog tias ICE tuaj txog rau lawv cov chaw. Lub Office of the Attorney General tau npaj cov lus nug thiab lus teb (FAQ) no rau kev qhia paub xwb, kom cov koom haum hauv Minnesota—xws li tsev kho mob, chaw pab neeg tsis muaj tsev nyob, thiab cov tsev teev ntuj—thiaj li tuaj yeem txuas ntxiv kom ib puag ncig nyab xeeb thiab zoo txais tos tau txhua tus neeg uas lawv pab. Lub Office kuj tau tshaj tawm [cov lus qhia yog tias ICE tuaj nyob hauv tsev kawm ntawv](#) yav dhau los. FAQ no tsis yog lus pab tswv yim txog txoj cai lij choj, thiab cov koom haum yuav tsum sab laj nrog lawv tus kws lij choj yog tias lawv muaj lus nug tshwj xeeb txog lawv cov cai thiab cov luag hauj lwm.

Leej twg yog tus tswj cov cai txog kev tsiv teb raws chaw?

Kev tsiv teb raws chaw los rau Teb Chaws Asmeskas yog raug tswj los ntawm txoj cai lij choj, thiab U.S. Department of Homeland Security (DHS). DHS siv txoj cai tsiv teb raws chaw los tiv thaiv kev nkag teb chaws uas tsis raug cai, thiab los nrhiav ntes thiab xa cov neeg rov qab mus rau lawv lub teb chaws yog tias lawv tsis muaj kev tso cai nyob hauv Teb Chaws Asmeskas. Lub luag hauj lwm tseem ceeb rau kev siv txoj cai tsiv teb raws chaw hauv DHS yog nyob ntawm U.S. Customs and Border Protection (CBP), U.S. Immigration and Customs Enforcement (ICE), thiab U.S. Citizenship and Immigration Services (USCIS). CBP tswj txoj cai tsiv teb raws chaw ntawm los sis ze ciam teb thiab cov chaw nkag teb chaws. ICE yog tus saib xyuas kev siv txoj cai nyob sab hauv teb chaws, nrog rau kev kaw thiab kev tshem tawm neeg. USCIS yog tus ua thiab tshuaj xyuas

cov ntawv thov thiab daim ntawv foob hais txog kev tsiv teb raws chaw thiab kev ua pej xeeb. Hauv daim ntawv FAQ no, thaum hais txog ICE, kuj suav nrog CBP ua ke thiab.

Vim li cas ICE los sis CBP thiaj li tuaj rau ib qho chaw uas raug suav tias yog chaw rhiab?

Cov neeg ua hauj lwm rau ICE tej zaum yuav tuaj rau ib lub koom haum los sis ib lub lag luam vim muaj ntau yam laj thawj cuam tshuam txog txoj cai tsiv teb raws chaw, xws li kuaj xyuas seb cov neeg ua hauj lwm puas muaj kev tso cai ua hauj lwm raws cai (piv txwv li, xyuas kom meej tias lub koom haum tsuas ntiav cov neeg uas muaj kev tso cai ua hauj lwm hauv Teb Chaws Asmeskas xwb), thiab los sis los ntes cov neeg uas tsis muaj kev tso cai nyob hauv teb chaws no raws cai.

FAQ no tsis hais txog ib lub koom haum cov cai thiab cov luag hauj lwm uas nws yuav tsum tau ua yog tias ICE tuaj kuaj xyuas kev tso cai ua hauj lwm ntawm cov neeg ua hauj lwm. Tsuas yog hais txog thaum ICE tuaj tshawb nrhiav los sis ntes cov neeg uas xav tias tsis muaj kev tso cai nyob hauv Teb Chaws Asmeskas raws cai xwb.

ICE los sis CBP tuaj yeem nkag mus tau qhov twg yam tsis tas thov kev tso cai?

Feem ntau, cov chaw uas muab kev pab cuam rau pej xeeb (xws li chav txais tos qhua) thiab cov chaw tsis yog rau pej xeeb (non-public) los sis chaw ntiag tug (xws li cov chav ua hauj lwm nram qab, chaw saib xyuas cov neeg mob, los sis chav so rau cov neeg ua hauj lwm), thiab cov cai no yuav siv txawv raws li qhov chaw uas ICE xav mus rau. Feem ntau, ib qho chaw raug suav tias tsis yog chaw pej xeeb thaum cov neeg nyob hauv qhov chaw ntawd cia siab tias yuav muaj kev ntiag tug thiab qhov chaw ntawd tsis qhib rau pej xeeb. ICE tuaj yeem nkag mus tau rau cov chaw pej xeeb yam tsis tas thov kev tso cai los ntawm lub koom haum yog lawv mus tswj txoj cai tsiv teb raws chaw. Piv txwv li, feem ntau ICE tsis tas yuav thov kev tso cai los sis muaj daim ntawv tso cai (warrant) thiaj li ua tau nws cov dej num hauv

chav tos nram tsev kho mob loj, chaw teev hawm hauv tsev teev ntuj, los sis chav nyeem ntawv hauv tsev qiv ntawv. ICE kuj tuaj yeem nkag mus tau rau cov chaw tsis yog pej xeeem yog tias lub koom haum kam tso cai rau lawv nkag. **Yog tias lub koom haum tsis tso cai rau ICE nkag mus rau nws cov chaw uas tsis yog chaw pej xeeem, ces ICE tsis tuaj yeem nkag mus tau tshwj tsis yog lawv muaj daim ntawv tso cai los ntawm tsev hais plaub (court-issued warrant) los sis daim ntawv txib (subpoena).**

Cov koom haum uas muaj chaw pej xeeem thiab chaw ntiag tug tej zaum yuav tau cim kom meej tias thaj chaw twg tsis qhib rau pej xeeem, xws li muab ib daim paib sau tias “private” rau ntawm lub qhov rooj chav so ntawm cov neeg ua hauj lwm, thiab xyuas kom meej tias kev nkag mus rau cov chaw ntawd raug txwv kom nruj. Cov koom haum yuav tsum xaiv ib tug neeg ua hauj lwm tshwj xeeb uas yog tus saib xyuas thiab sib txuas lus tau nrog ICE, thiab txhua tus neeg ua hauj lwm yuav tsum xa ICE cov neeg ua hauj lwm mus cuag tus neeg ntawd xwb.

ICE los sis CBP tuaj yeem ua dab tsi hauv cov chaw pej xeeem ntawm cov koom haum?

Feem ntau, ICE tuaj yeem ua txhua yam dej num uas yog raws cai hauv cov chaw pej xeeem ntawm ib lub tuam tsev. Qhov no suav nrog hais lus nrog cov neeg siv kev pab ntawm lub koom haum uas nyob hauv thaj chaw pej xeeem, mloog cov lus sib tham uas hnov tau thaum nyob hauv thaj chaw pej xeeem, thiab nyeem cov ntaub ntawv uas pom tseeb rau pej xeeem hauv thaj chaw ntawd. Cov koom haum yuav tsum xyuas kom meej tias lawv cov neeg siv kev pab cov ntaub ntawv ntiag tug tsis txhob muab cia rau qhov chaw uas pej xeeem pom tau, thiab tsis txhob sib tham txog cov ntaub ntawv ntawd rau qhov chaw uas lwm tug hnov thiab nrhiav tau yooj yim.

ICE los sis CBP yuav tsum muaj daim ntawv twg thiaj li nkag tau mus rau thaj chaw ntiag tug los tswj txoj cai tsiv teb raws chaw?

Yog xav nkag mus rau thaj chaw uas tsis yog pej xeeem yam tsis tau kev tso cai ntawm lub koom haum, ICE yuav tsum muaj daim ntawv tso cai los ntawm tsev hais plaub —kuj hu ua judicial warrant—los sis daim ntawv txib thiaj li tshawb nrhiav los sis tshuaj xyuas tau. Judicial warrant yog ib daim ntawv xaj sau tseg raws cai uas muab kev tso cai rau ICE cov neeg ua hauj lwm los ntes ib tug neeg, tshawb ib thaj

chaw, los sis khaws tseg cia tau tej ntaub ntawv. Yuav kom siv tau, daim judicial warrant yuav tsum:

- txais kev kos npe los ntawm tus kws txiav txim plaub ntug ntawm U.S. district court los sis tsev hais plaub hauv xeev;
- piav qhia kom meej txog qhov chaw yuav raug tshawb thiab/los sis tus neeg yuav raug ntes los sis cov khoom yuav raug khaws tseg; thiab
- sau hnub tim thiab tau raug lees txais tsis tshaj 14 hnub dhau los.

ICE kuj muab nws tus kheej cov ntawv tawm uas hu ua “administrative warrants” los sis “ICE warrants,” uas yog cov ntawv qhia kom ICE cov neeg ua hauj lwm mus ntes ib tug neeg uas raug liam tias ua txhaum txoj cai tsiv teb raws chaw qib teb chaws. **Administrative warrants tsis yog los ntawm tsev hais plaub, thiab TSIS pub ICE nkag mus rau thaj chaw ntiag tug yam tsis tau kev tso cai.** Cov administrative warrants no tej zaum yuav sau tias “Department of Homeland Security”, “Form I-200,” los sis “Form I-205.”

Cov koom haum muaj cai nyeem daim ntawv tso cai thiab kuaj xyuas kom meej tias puas yog judicial warrant thiab tias puas tso cai rau tus neeg ua hauj lwm nkag mus rau thaj chaw ntiag tug rau lub hom phiaj tshwj xeeb.

Ib txoj kev ceev faj thiab yooj yim los txheeb qhov txawv ntawm administrative warrant thiab judicial warrant yog saib sab saud ntawm daim ntawv thiab saib leej twg kos npe. Judicial warrant yuav muaj lo lus “court” nyob sab saud thiab yuav muaj tus neeg uas muaj npe hu ua “judge” kos npe. Administrative warrant yuav muaj lo lus “Immigration and Customs Enforcement” nyob sab saud, thiab tsis yog tus kws txiav txim plaub kos npe, tiam sis yog ib tug “officer” los sis “official” kos npe xwb. Nco ntsoov tias administrative warrant tsis tso cai rau ICE nkag mus rau thaj chaw ntiag tug yam tsis tau kev tso cai.

Tsis muaj leej twg raug yuam kom kam tso cai rau ICE nkag mus rau thaj chaw uas tsis yog pej xeeem. Yog tias ICE muaj administrative warrant, ces tej zaum lawv tab tom ua kev ntes ib tug neeg uas xav tias tsis muaj kev tso cai nyob hauv teb chaws raws cai. Yog tias lub koom haum tsis kam tso cai rau ICE tus neeg ua hauj lwm uas

muaj administrative warrant nkag mus rau thaj chaw ntiag tug, ces ICE tseem raug tso cai tos nyob sab nraum thaj chaw ntiag tug (xws li chaw nres tsheb uas yog chaw pej xeem) kom ntes tau tus neeg ntawd.

Cov chaw twg hauv ib lub chaw pab neeg tsis muaj tsev nyob yog chaw pej xeem, thiab cov chaw twg yog chaw ntiag tug?

Cov koom haum uas muab chaw nyob pab rau cov neeg kuj muaj chaw ntiag tug thiab, txawm tias lub chaw pab ntawd qhib rau pej xeem rau qee yam hauj lwm (xws li pub zaub mov noj). Ib yam li lwm lub koom haum los sis lag luam, seb ib qho chaw hauv lub chaw pab neeg tsis muaj tsev nyob puas yog chaw pej xeem los sis chaw ntiag tug yog nyob ntawm seb tus neeg nyob hauv thaj chaw ntawd puas muaj laj thawj cia siab tias yuav muaj kev ntiag tug thaum lawv nyob hauv thaj chaw ntawd. Feem ntau, chaw ntiag tug suav nrog chaw pw thiab chaw pw tsaug zog, txawm tias muaj ntau tshaj ib tug neeg siv lub chaw pab ntawd siv tib thaj chaw ntawd los xij. Piv txwv li, ib tug neeg nyob hauv chaw pab uas pw hauv ib thaj chaw loj uas muaj ntau tus neeg pw ua ke los yeej tseem muaj kev cia siab tias yuav muaj kev ntiag tug, thiab ICE yuav tsum muaj daim ntawv tso cai los ntawm tsev hais plaub thiaj li nkag tau mus rau thaj chaw ntawd. Cov neeg ua hauj lwm hauv chaw pab thiab cov neeg nyob ntawd tsis raug yuam kom kam tso cai rau ICE nkag mus rau chaw pw los sis thaj chaw nyob yog tias ICE tsis muaj daim ntawv tso cai raws cai.

Cov koom haum yuav tsum sib txuas nrog ICE los sis CBP li cas?

Cov neeg ua hauj lwm hauv lub koom haum yuav tsum nyob twj ywm thiab nyob tus yees thaum muaj kev sib txuas nrog ICE los sis CBP cov neeg ua hauj lwm. Yog tias ICE thov nkag mus rau thaj chaw ntiag tug, tus neeg ua hauj lwm yuav tsum sau tseg tus neeg ua hauj lwm lub npe, zauv ID, thiab lub npe ntawm lub chaw ua hauj lwm, thiab nug seb lawv puas muaj daim ntawv tso cai. Yog tias lawv muaj daim ntawv tso cai, thov ib daim ntawv luam thiab coj mus qhia rau tus neeg uas lub koom haum tau xaiv tseg los txiav txim tias yuav ua li cas tom ntej.

Cov neeg ua hauj lwm hauv lub koom haum muaj cai saib xyuas ICE cov neeg ua hauj lwm kom paub tseeb tias lawv ua raws li daim ntawv tso cai los ntawm tsev hais plaub thiab tsuas nkag mus rau cov thaj chaw ntiag tug uas tau teev tseg hauv daim ntawv tso cai ntawd xwb. Kev kaw suab los sis yees duab los ntawm cov neeg ua hauj lwm thaum muaj kev sib txuas nrog ICE kuj raug tso cai thiab. Cov neeg ua hauj lwm yuav tsum tsis txhob cuam tshuam ICE cov dej num raws cai, tab sis lawv kuj tsis raug yuam kom teb cov lus nug los sis qhia seb puas muaj ib tug neeg nyob hauv lub chaw ntawd los tsis muaj.

Kev muab ntaub ntawv cuav los sis dag rau ICE yog ib qho kev txhaum cai, thiab tej zaum yuav raug txim hnyav los yog raug foob txim txhaum ua rau txoj cai lij choj.

Cov koom haum puas yuav tsum txheeb xyuas tib neeg kev tsiv teb raws chaw los sis lawv tej cov ntaub ntawv?

Feem ntau, cov koom haum tsis raug yuam kom nug los sis khaws cia cov neeg uas lawv pab tej ntaub ntawv txog kev tsiv teb raws chaw. Ib lub koom haum tej zaum yuav thov cov ntaub ntawv tsiv teb raws chaw yog tias tus neeg xaiv thov qee yam kev pab tsoom fwm uas yuav tsum muaj cov ntaub ntawv ntawd, xws li thaum thov ntawv kho mob uas tsoom fwm them nyiaj rau. Yog tias ib lub koom haum khaws thiab tuav cov ntaub ntawv hais txog kev ua pej xeem los sis kev tsiv teb raws chaw ntawm nws cov neeg siv kev pab, ces tej zaum lub koom haum yuav raug yuam kom muab cov ntaub ntawv ntawd rau ICE yog tias ICE tau txais daim ntawv tso cai los ntawm tsev hais plaub. Txoj kev rhuav tshem cov ntaub ntawv uas tau teev tseg hauv daim ntawv tso cai los ntawm tsev hais plaub yog ib lub txim txhaum loj.